

華陽縣志卷三十

人物志

江漢炳靈岷峨毓秀代產俊英邑傳耆舊苟號華宗范稱世胄三雋才高二費文富李氏簪纓王家堂構忠節常昭武功允懋孝友無慚行誼克副維蜀多賢

仁恩廣覆作人物志

五代後蜀

歐陽炯一作迴華陽人事高祖後主歷官武德軍判官

華陽縣志

卷三十

人物

一

壬辰補刊

翰林學士中書舍人炯善文章尤工詩辭唐張素卿常繪十二真人像世稱其妙安思謙得素卿本乃於明慶節上獻後主命炯為之贊裝潢成帙其見重多此類也炯著有武信軍衙記花間集序傳世十國春秋云蜀人而舊通志作華陽人茲從之

宋

勾中正 字坦然華陽人孟昶時館于其相母昭裔第奏授校書郎舉進士累為昭裔從事歸朝歷曹潞二州錄事參軍汜水令精於字學古文

篆隸行草無不稱工太宗素聞其名中正獻八
體書授著作佐郎直史館被詔詳定篇韻太平
興國四年副張洎使高麗還遷左贊善大夫改
著作郎說文成上覽嘉賞模印頒行因問凡有
聲無字者幾何中正退條爲一卷以獻上曰朕
亦得二十一字可并錄之又命與著作郎吳鉉
大理丞楊文舉同撰定雍熙廣韻一百卷賜緋
魚加太常博士特拜虞部員外郎淳化元年改
直昭文館三遷屯田郎中中正杜門守道以文

華陽縣志

卷三十

人物

二

王辰補

翰爲樂受詔書太宗神宗諡寶篆文又命以大
小篆八分三體書孝經摹石凡十五年方成咸
平三年表上之眞宗召見便殿賜坐嘉歎良久
賜金紫命藏于秘閣乾州獻古鼎四足有古文
二十一字人莫能曉詔中正與杜鎬詳驗援據
甚悉卒年七十四喜藏書家無餘財子希古希
仲竝進士及第希仲太常博士宋史文苑本
傳并宏簡錄
羅處約 字思純華陽人形神豐碩兼富詞采嘗
作黃老先六經論人多重之太平興國八年登

第初調臨渙主簿再遷大理評事知吳縣王禹偁知長洲縣日以詩什唱酬蘇杭間多傳誦後并召赴闕上自定題試之以禹偁爲右拾遺處約爲著作郎詔求讜言處約上奏今三司非古制請依六典舊儀復尙書都省丞正員外郎主事合史之屬以今三司錢刀粟帛筭權支度之事均在二十四司俾各有司可以責其集事上謂相沿已久難於改更未幾爲荆湖路巡撫使淳化三年卒年三十三有東觀集十卷王禹偁

華陽縣志

卷三十

人物

三

爲序蘇易簡表上之詔付史館節錄宋史文苑本傳并宏簡錄

梁

鼎

字凝正華陽人祖鉞事蜀爲劍門關使

父文獻乘氏令鼎擢太平興國進士知秭歸縣遷著作佐郎端拱初獻聖德徽號頌萬餘言通判歙州以能聲聞有詔嘉獎徙知吉州民有蕭甲者豪猾爲民患鼎暴其凶狀杖脊黥面徙遠郡太宗尤賞其強幹代還特以犀帶賜之記其名於御屏淳化中上言請詔有司申明考績之法俄爲開封府判官遷三司總計判官會復三

部換度支判官至道初鼎泊陳堯叟建議興三
白渠及陳許鄧潁蔡宿毫數州用水利墾田事
遷都官員外郎江南轉運副使就改起居舍人
徙陝西歷知徐審二州咸平四年遷兵部員外
郎知制誥賜金紫時三司督逋負嚴急有久被
留繫者命鼎與映按籍詳定多所蠲免踰月拜
右諫議大夫度支使景德初知三班院通進銀
臺司兼門下封駁事出知鳳翔府以居憂哭泣
傷目表求判西京留司御史臺三年卒年五十

華陽縣志

卷三十

人物

四

王辰補刊

二賜二子出身鼎偉姿貌磊落尚氣有介節居
官峻厲名稱甚茂好學工篆籀八分書嘗著隱
書三卷史論二十篇學古詩五十篇子申甫吉

甫 宋史本傳

王 永 華陽人珪曾祖永事太宗爲右補闕吳
越納土受命往均賦至則悉除無名之算民皆
感泣使還或言其多弛賦租帝詰之對曰使新
附之邦蒙天子仁恩臣雖得罪死不恨帝大悅

宋史王珪傳

王罕 字師言華陽人珪季父以蔭知宜興縣湖田遇水旱輕重失平躬至其所列高下爲圖卽有訢謀按圖示之以蠲可否衆皆悅服范仲淹在潤奏以爲法累遷三司戶部判官出爲廣東轉運使儂寇反還惠州呼耆長發民丁每長二百令邑尉增弓手二千募有方畧者許以官秩金帛使爲甲首悉出公私戎器檄告屬城數日衆大振簡拔精銳三千建旗伐鼓方舟順下將至廣悉登岸營于南門徐開門而入智高遂

解去徙知潭州擢戶部度支副使爲政務適人情不尙威罰監司上治狀敕書褒諭賜絹三百徙知明州終光祿卿年八十

節錄宋史王珪傳并宏簡錄

劉美 字世濟華陽人本姓龔章獻明肅皇后

之父曰通少隸軍籍建隆初征嶺南有功爲虎捷都指揮使領嘉州刺史從征太原道卒美以鍛金爲業眞宗爲襄王時后自蜀來因張耆以進耆得之美所眞宗卽位以后爲美人乃更美姓以爲后兄補三班奉職遷右侍郎石保吉之

在陳州也大治解舍修城壁不以聞會有言其
擾民者遣美察其事美曰保吉受國恩列藩閫
營繕過度誠有之自餘保無患真宗意乃解還
朝為閣門祇候護兵屯於漢州徙嘉州召還提
點在京倉場后正位中宮遷南作坊使天禧初
遷治苑使領勤州刺史授龍神衛四廂都指揮
使改侍衛馬軍都虞侯遷武勝軍留後卒年六
十贈太尉昭德軍節度使

東都事畧
并宏簡錄

劉從廣

字景元華陽人少出入禁中侍仁宗左

華陽縣志

卷三十

人物

六

右太后愛之如家人子后崩真拜崇州團練使
娶荆王元儼女授滁州防禦使元昊反自言不
能扞患坐耗縣官願上所給公使錢帝嘉納之
除羣牧都監改副使特拜宣州觀察使同勾當
三班院請補外自效知洛州漳水溢穿隋故渠
以殺水勢洛人便之徙邢州籍鄉軍之罷老者
聽引子弟自代著為令召還復領三班院出知
襄州徙真定府路馬步軍副都憲總管卒贈昭

慶軍節度使諡良惠

宏簡錄
劉美傳

劉永年 字居錫華陽人美之孫四歲授內殿崇
班出入兩宮仁宗使賦小山詩有一柱擎天之
語以爲奇童常置內中年十二始聽出外累遷
廉州團練使陝州都監郭邈山等爲盜密遣壯
士夜渡河殺其凶桀二十餘人衆遂散遷幹轄
代還擢幹辦皇城司單州團練使永興路總管
契丹遣使來請帝繪像選副張昇報使會夜取
巨石塞驛門衆皆恐永年素有力手擲棄之驚
以爲神出知涇州賜詩寵行振武卒素驕歲折

支香藥三司不時輦致突入廳事請以他物代
語不遜永年數其罪斬爲首二人餘不敢動同
提舉在京諸司庫務出知代州契丹取西山木
前守皆不敢遏永年遣人盡焚之契丹移檄捕
縱火盜答以盜固有罪然發在我境何預汝事
乃不復問帝嘗問禦戎策對合旨書忠孝二字
以賜英宗立遷沂州防禦使累官步軍副都指
揮卒贈崇信軍節度使諡莊恪

宏簡錄
劉美傳

范 鎮 字景仁華陽人薛奎守蜀一見愛之及

還朝載以俱曰得一偉人當以文學名世舉進士調新安主簿西京留守宋綬薦召試學士院得館閣校勘擢起居舍人知諫院上疏論民田困敝請約祖宗以來官吏兵數酌取其中爲定制又請使三府通知兵民大計與三司同制國用帝在位三十五年未有繼嗣嘉祐初暴得疾中外無不寒心莫敢先言者鎮獨奮然拜疏曰願以大祖之心行真宗故事接近屬之賢者優其禮秩置之左右與圖天下事以繫兆人心章

累上不報待命百餘日鬚髮爲白朝廷知不能奪罷知諫院改集賢殿修撰英宗立遷翰林學士王安石改常平爲青苗鎮言不足法疏五上安石大怒持其疏至手顫自草制極詆之以戶部侍郎致仕日與賓客賦詩飲酒哲宗立韓維言鎮在仁宗時有啟建之議未嘗以語人具以十九疏上之拜端明殿學士且欲以爲門下侍郎鎮雅不欲起從孫祖禹亦勸止之遂固辭再致仕累封蜀郡公鎮尤注意樂自謂得古法獨

主房庶以律生尺之說樂成賜詔嘉獎下之太常薨年八十一諡曰忠文

節錄宋史本傳并宏簡錄

王琪字君玉華陽人珪從兄兒童時已能爲

歌詩起進士調江都主簿上時務十二事仁宗嘉之除館閣校勘集賢校理帝宴大清樓命館閣臣作山水石歌琪獨蒙褒賞詔通判舒州歲饑奏發廩救民未報先賑以公租守以下皆不聽琪挺身任之知復州歷開封府推官兩浙淮南轉運使判戶部勾院知制誥嘗入對便殿帝

從容謂曰卿雅有心計若三司缺使當無以易卿久之以龍圖閣待制知潤州轉運使欲浚常潤漕河琪陳其不便詔寢役而議者卒請發古城埭破古函管而浚之河反狹舟不得方行公私交病徙知江寧先是府多火災或託以鬼神人不敢救琪召令廂邏具爲作賞捕之法未幾得姦人誅之火患遂息復知制誥加樞密直學士以禮部侍郎致仕卒年七十二琪性孤介不與時合數臨東南名鎮政尙簡靜葬於真州詔

真揚二州發卒護其宅蓋異數也

宋史王珪傳

李大臨字才元華陽人登進士第為絳州推官文彥博薦為秘閣校理仁宗嘗遣使賜館閣官御書至大臨家大臨貧無阜隸方自秣馬使者還奏帝曰真廉士也以親老請知廣安軍徙邛州還為羣牧判官開封府推官神宗雅知其名擢修起居汪進知制誥糾察在京刑獄言青苗法有害無益王安石怒會李定除御史宋敏求蘇頌相繼封還詞命次至大臨大臨亦還之復

詔諭數四頌大臨固爭不已乃以累格詔命皆歸班大臨以工部郎中出知汝州辰溪貢丹砂道葉縣其二篋化為雙雉闕山谷間耕者獲之人疑為盜械送於府大臨識其異訊得實釋耕者徙知梓州加集賢殿修撰復天章閣待制甫七十致仕七年而卒大臨清整有守議論識大體自爭李定後名益重世并宋敏求蘇頌稱為

熙寧三舍人云

宋史本傳

王珪字禹玉華陽人少孤育於季父罕教養

有恩弱歲奇警語出驚人從兄琪讀其文曰真
騏驥也志已在千里但蘭筋未就耳舉進士庭
試第二爲大理評事通判揚州召試學士院遷
太子中允直集賢院同修起居注改右正言知
制誥嘉祐中中書召作詔立皇子辭曰此大事
也非面受旨不可明日請對再拜賀始退而草
詔歐陽公聞之歎曰真學士也神宗立遷學士
承旨凡典內外制十八年最爲久次上每稱其
制誥有體他學士不能及後累官尙書左僕射

恭門下侍郎封岐國公卒於位年六十七諡文
兼有文百卷號華陽集

節錄宋史本傳并
東都事畧宏簡錄

李

畋

字渭卿華陽人自號谷子少師任奉古

以著述爲志不樂仕進士大夫多稱之爲張乖
崖所器少日一出廷試後隱居永康軍白沙山
從之學者甚衆任中正薦乞賜處士之號詔爲
試校書郎凌策又薦之召援恒寧主簿國子監
說書改大理丞知泉州惠安縣久之以先所著
朱成再乞國子監說書以修其業著孔子弟子

傳讚六十卷上之得知榮州秩滿致仕畋撰道

德疏二十卷張乖崖語錄二卷谷子三十卷歌

詩雜文七十卷年九十

澠水燕談錄

鄭少微 字明舉華陽人元祐進士時蘇軾知貢

舉得少微與古鄉楊天惠三嶼李新時人號為

三儁宣和間上書論時政坐廢貧無田宅寓居

金繩院十五年不屈其志學益古文益工後徙

居臨邛自號木雁居士有集行於世官至朝請

郎 宋史文苑劉涇傳并蜀人物志舊通志

華陽縣志

卷三十

人物

三

李大厚 華陽人博學工文詞從兄大臨自謂不

如大厚及長子陞同登第 費著氏族譜

范百祿 字子功華陽人鎮兄子第進士又舉才

識兼茂科對策入三等提點江東利梓路刑獄

加直集賢院利州武守周永懿以賄敗百祿請

復至道故事用文吏領兵以轄邊界從之七年

召知諫院屬歲旱講求急務收還法令之未便

者以救將死之民與徐禧治李士寧獄坐士寧

罪死不赦禧右士寧以為無罪執政主禧貶百

祿監宿州酒哲宗立遷中書舍人司馬光復差役法患吏受賕欲加流配百祿固爭遂已元祐元年爲刑部侍郎改吏部侍郎都水王孝先議回河故道大防意向之命百祿行視百祿以東流高仰而河勢順下不可回卽馳奏所以然之狀且取神宗詔令勿塞故道者併上之俄兼侍讀進翰林學士爲帝言分別邪正之目以類相反者凡二十餘條以龍圖閣學士知開封府勤於民事獄無繫囚數月復爲翰林學士拜中書

華陽縣志

卷三十

人物

三

王辰補刊

侍郎後以資政殿學士知河中徙河陽河南夔年六十五

節錄宋史
范鎮傳

范百常 華陽人鎮兄鑑卒於隴城無子聞其有遺腹子在外鎮時未仕徒步求之兩蜀間二年乃得之曰吾兄異於人體有四乳是兒亦必然已而果然名曰百常初茂州有蓋塗靜當直時飛宕恭九種蠻蠻自推一人爲將治其衆將常詣州受約束州居羣蠻中地不過數十里宋初無城隍惟植鹿角自固蠻乘夜屢入寇民甚苦

之熙寧八年相率詣州請築城知州事范百常實主是役蠻以爲侵其地率衆奄至百常擊走之乃合靜時等蠻來寇百常拒守凡七十日詔遣王中正將陝西兵來援誅殺頗衆蠻乃降

宋史

范鎮傳并威茂渝州蠻傳

范祖述 華陽人鎮從孫祖述監潁川酒稅攝獄掾閱具獄活兩死囚州人以其神知鞏縣鑿南山導水入洛縣無水患文彥博稱其能以父墮黨籍監中岳廟久之通判涇州知台州奏罷黃

華陽縣志

卷三十

人物

古

王辰補刊

甘葛葦之貢主管西京御史臺靖康多難避地至汝州汝守趙子櫟邀與共守於是旁郡盡陷汝獨全累官朝議大夫卒

宋史范鎮傳

范祖禹 華陽人鎮從孫字淳甫一字夢得其生也母夢一偉丈夫曰吾漢將軍鄧禹遂以名幼孤叔祖鎮撫育如己子第進士甲科從司馬光編修資治通鑑書成薦爲秘書省正字時王安石當國尤愛重之安石與祖禹友善嘗諭安石意竟不往謁富弼致仕居洛罕與人接待祖禹

獨厚疾篤召授以密疏大抵論安石誤國及新法之害言極憤切弼薨人皆以爲不可奏祖禹卒上之神宗崩祖禹上疏論喪服之制立擢右正言呂公著執政祖禹以壻嫌辭改除著作佐郎修神宗實錄呂公著薨召拜右諫議大夫首上疏論人主正心修身之要宣仁太后崩中外議論洶洶人懷顧望在位者畏懼莫敢發言祖禹慮小人乘間害政乃奏請辨析是非深拒邪說有以姦言惑聽者付之典刑痛懲一人以警

羣慝章累上不報會上有相章惇意祖禹力言其不可用不從遂請外乃以龍圖閣學士知陝州言者論祖禹修實錄詆誣又摭其諫禁中雇乳媪事連貶安置永州賀州又徙賓化而卒年五十八祖禹平居恂恂口不言人過至遇事則別白是非不少惜隱在邇英守經據正獻納尤多開列古義參之時事言簡而當蘇軾稱爲講官第一嘗進唐鑑十二卷帝學八卷仁皇政典六卷而唐鑑深明唐三百年治亂學者尊之曰

爲唐鑑公云

節錄宋史
范鎮傳

李

陶

華陽人李大臨二子陶從司馬公光於

洛當時大老皆喜之在錢塘蘇公軾送之詩忠

文文正二大老蘇李廣平三舍人喜見通家賢

子弟因言得邑少風塵其趣遠矣隲通達明敏

吏事有能名尤工於書子時雍時敏皆世其學

時雍高廟稱之弟兄多顯者

氏族譜

李

陞

華陽人陞與父大厚同登第後三年弟

降亦登第陞五典州號循吏降行義克著范公

華陽縣志

卷三十

人物

六

王辰補

鎮薦之朝爲金部郎中宣和間提學秦鳳路列

郡刺史拜宣撫使童貫降獨長揖曰我師儒官

也遂致仕

氏族譜

李時亮 華陽人陪之子伯父陞欲官之辭泊命

又以遣長官之章已上會陞子從政郎時任卒

時亮亟追還以與時任之子識後時亮二子登

第三子以恩得官諸孫一以恩得官一登第云

氏族譜

宇文虛中 字叔通華陽人登大觀進士第歷官

州縣入爲起居舍人遷中書舍人宣和間蔡攸童貫貪功開邊將興燕雲之役引女真夾攻契丹虛中以廟謨失策主帥非人上書言之王黼大怒降集英殿修撰督戰益急虛中進十一策上二十議皆不報幹星雅布尼堪分道入侵九月至汴京迫太原帝顧虛中曰王黼不用卿言今金人兩路竝進奈何卽命虛中草詔帝覽之曰今日不吝改過可便施行遂以虛中爲資政殿大學士軍前宣諭使虛中邀趣姚帥道兵馬

令直赴汴應援金人復引兵逼城下虛中縋而入欽宗欲遣人奉使大臣皆不肯行虛中承命凡數往言者劾其割地之罪罷知青州尋落職奉祠建炎元年竄韶州二年詔求使絕域者虛中應詔爲祈請使楊可輔副之明年春金人并遣歸虛中以二帝未還不可歸於是獨留金人加以官爵卽受之因是知東北之士皆憤恨陷北遂密以信義結約金人不覺也王倫歸言虛中奉使日久守節不屈遂詔福州往往存恤其

家仍命其子師瑗添差本路轉運判官檜銜虛中阻和議悉其家往金因以牽制之虛中恃才輕肆好議訕貴人達官積不平由是媒孽成其罪告虛中謀反鞠治無狀乃羅織虛中家圖書爲反具與老幼百口同日受焚死淳熙間贈開府儀同三司賜諡肅敏賜廟仁勇且爲置後節錄
宋史本傳并宏簡錄按幹里雅布尼堪舊作幹离卜粘罕今遵金史國語解改正

范 冲 字元長華陽人祖禹之子登紹興進士

第高宗卽位召爲虞部員外郎俄出爲兩淮轉

運副使紹興中詔重修神哲兩朝實錄召冲爲宗正少卿兼直史館冲父祖禹元祐中嘗修神宗實錄盡書王安石之過以明神宗之聖其後安石婿蔡卞惡之祖禹坐謫死嶺表至是復以命冲上謂之曰兩朝大典皆爲姦臣所壞故以屬卿冲因論熙寧寧勅置元祐復古紹聖以降弛張不一本末先後各有所因又極言王安石變法度之非蔡京誤國之罪上嘉納之遷起居郎俄開講筵升兼侍讀上雅好左氏春秋合冲與

朱震專講沖敷衍經旨因以規諷上未嘗不稱善會皇子建國公瑗出就傳首命沖以徽猷閣待詔提舉建隆觀爲資善堂翊善而朱震兼侍讀時張浚在長沙亦薦沖震可備訓導沖震皆一時名德老成極天下之選俄遷翰林學士兼侍讀沖力辭改翰林侍讀學士用其父故事也尋以龍圖閣直學士奉祠卒年七十五節錄宋史本傳

王 案 字道輔華陽人少有詩名世謂其詩初

若不經意然遣辭屬意清麗絕人自號南陔居

華陽縣志

卷三十

人物

五

士著有岷山百景詩二卷

蜀中著作記

元

費 著 華陽人進士授國子助教有詩名母喪

盡禮哀毀骨立歷漢中廉訪使調重慶府總管

卒於犍爲兄克成亦進士時人謂成都二費

舊通

志按著著有氏族器物牋紙蜀錦錢幣楮幣歲華紀麗等譜詳見典籍并藝文

明

鄒 昱 華陽人僞夏平章鄒興之子興治民有

恩爲夏守瞿唐死於陣太祖義之命入祀昱於

洪武中由太學生授漢中府同知勤政敢為歷
官有能聲終湖廣布政使

明統志并舊通志按一作洪武中一作永

樂初三
字互異

溫琮 字廷瑞華陽人景泰進士成化間按滇

中官錢能貪橫琮執法不阿能斂手避之風裁

特著弟璽成化進士歷河南參議子仁和官至

禮部尚書

雲南通志并蜀人物志

謝秉中 華陽人天順進士任御史剛介正直不

避權貴尋升雲南副使

蜀人物志

華陽縣志

卷三十

人物

三

王 弼 華陽人天順間進士初知開化豪民余

聯勒奪人田上妻女持府縣短長前令不能制

弼以法繩之其黨懼誅火牛尾為厭勝術弼捕

之急乃夜持匕首匿公廨將害弼為雷震死後

擢監察御史平反獄囚數十人升福建僉事漳

南溫文聚眾為惡弼以計獲斬之眾遂散弼質

實清慎居喪三年足不至公府子汝舟汝梅俱

登進士

舊通志按王弼成化丙戌進士舊志作天順誤

張 賁 華陽人成化丙戌進士仕至太僕寺少

卿爲人謙恭勤儉莅官得民心旣歸適情山川
鄉黨稱其清介

劍閣芳華集

王汝梅 字濟元華陽人由行人歷禮科都給事中時帝從張孚敬議去孔子王號改稱先師編修徐階以諫謫御製改正祀典說頒示廷臣黎貫率同官合疏爭之帝震怒褫貫爲民方上疏時汝梅亦率同官抗論且曰陛下萬幾之餘留神典禮甚盛舉也但恐生事之臣望風紛起今日獻一議謂某制當革明日進一說謂某制當

華陽縣志

卷三十

人物

三

王辰補列

復國家自此多事矣况祖宗成法守之百六十年縱使少不如古循而行之亦未爲過何必紛紛事更易乎帝覽奏斥其違旨以祀典說示之八年二月以災異求言汝梅言比來章奏多逢迎請分別忠佞毋信諛言大臣奏事近多留中請悉付之公論人主之學詞命非所重今一事之行動煩宸翰亦少褻矣宜倣祖宗故事時御平臺召見宰執面決大議旣省筆札之勞且絕壅蔽之害疏入忤旨及夏言請分祀天地汝梅

復偕同官力爭尋出爲浙江參政卒於官節錄明史

黎貫傳

溫仁和 字民懷華陽人宏治壬戌進士舉止端

重沈深善謀數抗論國事大同之卒擁兵阻城

仁和謂當慰問代藩遣官因視卒罪狀可撫則

撫之便有寧夏撫臣以慶王不軌事聞請徙之

高牆因興兵按累從反者仁和謂事未彰白未

可卽禁錮請赦戒諭王不悛而後治之以明朝

廷議親之仁旣而遣官簿問王果得赦而夏人

華陽縣志

卷三十

人物

三

壬辰補刊

免于兵家圖像以祀曰活夏城者溫公也官禮

部尙書大學士諡文恪劍閣芳華集并焦坎玉堂叢語

王汝舟 華陽人弼之子進士歷官左布政使篤

實清介心貌如一歸家惟圖書而已蜀人物志按汝舟正

德戊辰科進士

劉大直 華陽人乙未進士嘉靖間巡撫貴州具

文武才立保甲法以止盜延工師以教織清屯

田練士卒省驛遞甫六月卒民罷市哭之貴州通志

胥 鉉 華陽人嘉靖庚子舉人性忠介官提舉

謹修職業未幾拂衣歸

舊通志

于德昌 華陽人嘉靖辛丑進士孝友著聞歷任

戶部郎疏陳時政知真定府擢徐州兵備值倭

警城外搢紳士民以城閉不能入號哭城下德

昌遽令以竹籠數百合軍士緣載而上全活不

可勝數升河南參政致仕歸里撫兒孤延采如

已子領丙子鄉薦第二

舊通志

王 印 字德徵華陽人嘉靖戊午鄉薦任粵西

義寧縣有少年武斷一邑者印擒治之乃潛置

華陽縣志

卷三十

人物

三

蠱毒欲害印印不死民以為神素性嚴重恥干

諛蜀中當事多重之

舊通志

苟 誥 華陽人嘉靖間任南安知州性剛操潔

值州境安童堡夷賊肆掠渠魁數十人皆勇悍

狡黠誥出奇攻入巢穴伏兵格殺之立哨於要

地調官卒守禦民感其德立祠祀焉

雲南通志

劉 美 字世德華陽人萬歷甲戌進士孝事孀

母任洋縣令調金壇兩邑皆著循聲入為戶部

主事司榷九江以廉直自矢任滿乞終養所著

有臆說雜俎集解

四川總志

李元齡 字仁卿華陽人弱冠登鄉薦丁丑成進

士守臨清入為都水郎轉平陽太守晉山西憲

副乞休所著有翼經隨筆及詩文若干卷

蜀人物志

李商耕 華陽人萬歷癸未進士以父先芳年耄

請終養起遷戶部主事監稅德州釐盡弊察廉

貪屬吏望風斂戢擢守襄陽後忤權璫左遷兩

浙運同商耕不辨毅然解組襄人為立去思碑

舊通志

華陽縣志

卷三十

人物

一

何仕紳 華陽人以鄉舉授長沙司李清操自勵

攝湘潭篆均徭省賦雪理冤獄卓有治績

湖南通志

李一敬 華陽人恬靜端方甘貧力學中萬歷辛

丑進士任卽墨合約已愛民以勞瘁卒邑人哀

痛襯歸里妻孥有饑色

蜀人物志

楊師心 字觀吾華陽舉人再上春官不第隱居

不出日以歌咏自娛結社引掖後進萬歷丙午

華陽令王道成列其事上孔直指為疏於朝比

於梁山來知德上下吏禮二部議會師心以疾

卒故時人亦稱心徵君云

蜀人
物志

顧其仁 字湛一華陽人任工科都給事中天啟
間逆璫魏忠賢擅權其仁特疏糾參落職為民
崇正元年以忠鯁復原官尋遷陝西參政致仕

卒 舊通志

王 景 號河占華陽進士以部郎出為永州府
知府有風裁時屬多白役為民害景嚴為禁約
民以休息嘗捐費改建郡學以秉正不阿棄官
公論既明特起知河南懷慶府崇正間任金滄

華陽縣志

卷三十

人物

三

壬辰補刊

道剔蠹釐奸不遺餘力修蒼麓書院

湖南通志并
雲南通志

國朝

顧 諶 邑人 國初貢生性嚴正寡言笑見者
咸肅然起敬所居四壁書格言往來無雜賓蜀
罹兵燹後人罕言學諶倡明經義多士宗之子
姪俱列名膠庠城南蘇坡橋圯獨力任修並市
藥餌以濟貧病後孫汝修掇巍科官京尹人以

為積德所致云 續增

毛振翮 字翥蒼邑人倜儻有才智康熙戊子舉

於鄉時邑併入成都故隸籍焉雍正間試吏雲南從征西域大吏以爲能擢陸涼州牧五年遷黔古州司馬適新疆苗民不靖翽以儒生籌餉偕武臣親甲冑冒矢石身先士卒屢著勞績未幾蕩平振興學校苗民化之後有補弟子員者乾隆二年授保定司馬旋罷官歸怡情詩酒以壽終著有半野居士集續增

謝瑄 字仙玉號德川邑人雍正癸卯鄉薦歷

任浙江德清餘杭石門令蒞石門最久政績尤

華陽縣志

卷三十

人物

三

壬辰補刊

著有田濱河大水輒傷稼瑄濬渠築堤遂成沃壤一豪家女許字貧士旣而悔之瑄捐俸爲主其婚卒成禮鄰邑某令獲巨盜欲中傷瑄使供稱石門人盜曰寧死不忍累謝父母其感人如此後遷刑部山西司主事告歸卒年七十五子三祈昭昕中庚寅舉人官東陽令續增

顧汝修 字息存號密齋邑人幼孤性聰慧博覽典籍善屬文補弟子員雍正己酉拔貢旋舉於鄉乾隆壬戌成進士授編修逾年遷詹事府右

贊善充講官升順天府尹莅任卽革除諸弊清積案不動聲色一言折之而定旋補大理寺少卿奏讞或有未允卽與刑部駁詰刑部尚書某汝修座主也謂之曰君無太剛汝修曰事論可否不當問剛柔也其風節蹇諤如此

特賜正一品服冊封安南同時名宿如沈德潛陳兆崙皆相與友善回籍後掌教錦江書院及山西平陽書院造士有法門下士知名者甚衆晚精宋儒之學著有鈞引篇四勿箴味竹軒詩文集藏於

華陽縣志

卷三十

人物

三

壬辰補刊

家子柟庠生

續增

敬華南 字位中號蓮峯邑人少遊於江南儲掌文之門精制藝試每屈其曹乾隆丁卯膺鄉薦戊辰成進士本姓苟氏引對時

上特御丹臺於苟旁加文字遂氏敬焉入翰林授檢討典試山右稱得人出宰江南常熟縣政多慈惠民謳頌之歸田後主講錦江潛溪兩書院誘掖後進亶亶不倦著有書院學約行世子二基典惇典惇典以選拔官黃陂令

續增

潘元音 字希聲號東菴邑人天性孝友資稟穎異讀書目數行下工詩古文辭乾隆庚辰

恩科舉於鄉兩應禮部試不遇大挑二等歷任綦江鹽源諸學教諭己酉截取授廣東陽山縣知縣邑爲唐韓昌黎舊治有祠在至卽禱焉以廉潔自矢值歲饑蠲除苛擾民困以蘇時冷水坑有鹽獍張在潮者聚衆標掠前令不能禁胥役利其賄爲之耳目元音廉得其情詭爲乘舟赴省忽返棹至冷水坑收在潮等置之法治西有髻髻山

獍獠接壤久爲盜藪民患苦之元音乃約文武員弁率兵往勘乘其無備徑抵巢穴賊衆驚散卽設卡守隘使不得復聚境遂平他如決疑獄恤民冤上官咸服其明敏壬子分校鄉闈所得多名士未幾解組歸繞道赴楚之武攸祭謁先塋并出俸餘置祀田若干畝俾族中貧者得以贍養及還蜀衣篋書笥外無長物家居授徒遠近從學者甚衆年七十四卒著有東菴詩文集孟子文批諸書行世子時彤嘉慶甲子科舉人

倪慶 字天錫性聰敏嗜學乾隆壬午膺鄉薦
揀發福建歷任尤溪古田諸縣令權上洋南勝
別駕所至有聲蒞順昌時吏胥多奸有四頭八
黑之目俱置之法一邑稱快南平當孔道差使
絡繹前令某負公項至五萬金大吏知慶才檄
往代治年餘興利剔弊彌補過半而囊橐蕭然
一無所有未幾丁祖母艱歸里爲伯國珍請祀
鄉賢教弟憲補弟子員年五十七卒無嗣姪文
隆爲之後續增

華陽縣志

卷三十

人物

三

王廣益 字守謙邑人性曠達工詩善書試輒高
等乾隆乙酉舉於鄉風致翩翩有才士之目續增

彭國器 邑人乾隆辛卯膺鄉薦大挑二等歷官
清溪絲州教諭課士甚勤多所成就選授福建
永福令政簡刑清民困以甦廉潔自持有行賄
賂者笑遣之亦不揭其私去官日惟圖書數卷
人稱爲清白吏云續增

彭以懋 邑人乾隆辛卯舉於鄉大挑一等授甘
肅燉煌令治民以寬頑梗化之性恬澹不希榮

進在官數載引疾歸徙居天彭山中足不履
市課子耕讀宴如也續增

華陽縣志

卷三十

人物

三